

20 OCT 2001

Belanjawan-Sambut baik

LAGI PERSATUAN SAMBUT BAIK BELANJAWAN 2002

KUALA LUMPUR, 20 Okt (Bernama) -- Lebih banyak persatuan menyambut baik Belanjawan 2002 yang diumumkan Perdana Menteri Datuk Seri Dr Mahathir Mohamad yang juga Menteri Kewangan di Dewan Rakyat semalam.

Kongres Kesatuan Sekerja Malaysia (MTUC) menyifatkan Belanjawan 2002 sebagai belanjawan yang menjurus kepada pertumbuhan kerana ia mengambil kira ketidakpastian dalam senario luar seperti perkembangan di Amerika Syarikat dan Afghanistan.

Presiden MTUC Senator Zainal Rampak berkata kerajaan telah menarik perhatian tentang perlunya mengekalkan daya saing dan pengagihan kekayaan secara sama rata dan MTUC menyokong penuh usaha kerajaan untuk membantu syarikat yang bermasalah melalui penyaluran semula modal dengan tujuan untuk melindungi aset dan menyelamatkan pekerjaan.

"MTUC juga menggesa majikan mencontohi langkah kerajaan dengan menyediakan pendidikan dan latihan kepada pekerja dan tidak sebaliknya memberhentikan pekerja dengan sewenang-wenangnya," kata beliau dalam satu kenyataan di sini hari ini.

Beliau berkata sebagai warga korporat yang bertanggungjawab, majikan harus sama-sama memikul tanggungjawab bersama kerajaan dan membantu negara menghadapi cabaran.

Majlis Belia Malaysia dalam kenyataannya pula menganggap Belanjawan 2002 sebagai menyediakan asas yang strategik dan kukuh bagi pembangunan negara dalam masa sepuluh tahun akan datang.

Presidennya, Saifuddin Abdullah berkata dengan belanjawan strategik ini, kerajaan akan mampu mengemudi pembangunan negara dengan jayanya.

"Jika dengan pelaksanaan pembangunan yang praktikal Malaysia berjaya mengeluarkan diri daripada kegawatan ekonomi pada 1997, maka dengan perancangan yang sama baiknya ini, Malaysia pasti boleh melakukannya," katanya.

Persatuan Perubatan Malaysia (MMA) juga menyambut baik Belanjawan 2002 kerana belanjawan ini membolehkan semua rakyat -- baik yang miskin mahupun yang kaya -- berpeluang menikmati kemudahan kesihatan.

Presiden MMA Datuk Dr N. Athimulan berkata pengecualian cukai ke atas peralatan pendidikan, peruntukan RM202 juta untuk membina 283 klinik kesihatan, RM6.3 bilion untuk hospital dan klinik kesihatan, dan pertambahan elaun bagi kerja lebih masa menjadikan Belanjawan 2002 sebagai "Belanjawan Sihat".

Pergerakan Pemuda Parti Progresif Penduduk Malaysia (PPP) dalam kenyataannya di sini hari ini berharap syarikat-syarikat pengangkutan serta perniagaan berasaskan petroleum tidak mengambil kesempatan untuk menaikkan harga keluaran barangan mereka.

"Kami juga berharap usahawan restoran dan kelab persendirian tidak mengambil kesempatan ini untuk mengenakan cukai perkhidmatan walaupun nilai jualan tahunan tidak mencapai RM300,000," kata penolong Setiausahanya, Inder Singh.

Persatuan Pengguna Pulau Pinang (CAP) dalam satu kenyataan berkata kenakkan cukai bagi rokok adalah memadai kerana ia tidak memberi banyak kesan ke atas rokok.

Presiden CAP S.M Mohamed Idris berkata harga runcit rokok dijangka naik sebanyak hanya 5 peratus dan ia tidak akan menjadi langkah berkesan ke atas perokok dan mereka yang cuba untuk merokok terutama generasi muda.

Beliau berkata selaras dengan kempen cara hidup sihat, pihak berkenaan

harus mengambil pendekatan dua penjuru dengan menaikkan duti ke atas rokok, menyebabkan harga rokok di pasaran naik sekurang-kurangnya RM8 satu kotak mengandungi 20 batang rokok.

"Pihak berkenaan juga harus meningkat pemantauan ke atas aktiviti penyeledupan dan mengambil langkah-langkah ketat," kata beliau dalam satu kenyataan.

-- BERNAMA

AT KHY FAZ